

# Marcus Caduff ha già success cun sia intervenziun

L'emprim analisar, suenter politisar e lura decider

■ **(anr/vi) L'emprim èsi d'analisar da rudent e pir pli tard vegn fatg ina lescha per il svilup economic dal Grischun. En quest senn ha il cussegl grond acceptà ier cun 105 cunter 0 vuschs l'incumbensa dal deputà lumnezian.** En sasez fiss il sboz da la lescha già stà sin maisa ed il cussegl grond avess già da tractar quel il december vegnint. Ma il sboz n'ha para persvadì nagin. Ier han ils deputads perquai dà suatientscha a l'incumbensa da *Marcus Caduff* (pcd/Lumnezia) che pretenda l'emprim in rapport cun in'analisa precisa da l'economia ed ina strategia per il futur.

«Ina politica economica dovra ina focussaziun», scriva Caduff en sia intervenziun. «Far dapertut tut n'è betg in concept empermettent.» Ier durant la debatta ha il deputà agiuntà: «L'emprim ston ins savair en tge direcziun ch'il viadi va e pir suenter pudain nus focussar nossas ressursas.» Pli-navant stoppian ins resguardar las differenzas regiunalas. Quai che saja impurant per la Val dal Rain na valia betg ex-num per las regiuns periferas. A la fin da ses pled ha il deputà avertì la regenza da betg palandrar e spustar il rapport fin a las chalondas grecas.

Trachsel ha empermess che la regenza

planiseschia da suttametter il rapport già l'october dal 2014 al cussegl grond. Il rapport giàja pli lunsch ch'il sboz da la lescha. I saja necessari da collavurar cun tuts departaments e quai dovria ses temp.

L'idea per ina analisa e strategia fundamentala ha chattà accoglientscha da tuttas

varts. «Jau sun cuntent cun la resposta da la regenza», ha ditg *Heinz Dudli* (pbd/Tschintg Vitgs). I dovria ina collavuraziun da tuts departaments per cuntanscher ina buna politica economica. Per gliez saja necessaria ina politica coherenta ed ina analisa exacta da la situaziun actuala.



**Il schef da la fracziun cristiandemocratica dal cussegl grond Marcus Caduff (Lumnezia) (san.) en discurs cun collegas da la fracziun.**